



IMT-GT AREX '09 CAPAI MATLAMAT

Kejayaan penganjuran Karnival Varsiti IMT-GT ke-11 pada akhir Mac lalu telah mencetuskan hasrat untuk menjalinkan hubungan kerjasama di dalam bidang penyelidikan di kalangan institusi pengajian tinggi bagi tiga buah negara dalam wilayah IMT-GT tersebut. Justeru itu, tercetuslah idea untuk menganjurkan Pameran 'IMT GT - Academic & Research Exposition' (IMTGT-AREX 2009).



Bahagian penyelidikan dan inovasi UniMAP selaku sekretariat penganjur telah diamanah menganjurkan ekspo tersebut bersempena dengan sambutan Hari Keputeraan DYMM Raja Perlis yang Ke-66. 'Strengthening Agricultural Entrepreneurship Through Engineering' merupakan tema ekspo ini dan sebahagian besar produk-produk penyelidikan yang dipamer juga adalah ke arah bidang-bidang berkaitan. Ekspo yang berlangsung pada 16 dan 17 Jun 2009 bertempat di Dewan 2020, Kangar ini telah menghimpunkan hasil-hasil penyelidikan terkini dari universiti-universiti di dalam gabungan IMT-GT. Antaranya ialah Hatyai University, Walailak University, Prince Of Songkla University & Thaksin University, Universitas Sumatera Utara, Universitas Negeri Medan, Universitas Muhammadiyah Sumatera Utara dan Institut Teknologi Medan, Indonesia.

UniMAP juga telah menjemput beberapa institusi penyelidikan, pendidikan tinggi serta agensi-agensi terpilih di sekitar utara semenanjung Malaysia untuk turut serta dalam ekspo dua hari ini. Di antara institusi pendidikan tempatan yang turut terlibat adalah Universiti Sains Malaysia, Universiti Utara Malaysia, Universiti Teknologi MARA Kampus Perak, Universiti Teknologi MARA Kampus Shah Alam, Universiti Perguruan Sultan Idris, Universiti



Tun Hussien Onn Malaysia, Politeknik Arau, Kolej Matrikulasi Perlis dan Kolej Komuniti Arau. Ekspo tersebut telah disempurnakan perasmiannya oleh DYTMs Tuanku Canselor UniMAP dan turut disaksikan oleh Y.A.B. Menteri Besar Perlis, Pengerusi Lembaga Pengarah Universiti, Naib Canselor UniMAP serta para tetamu dari dalam dan luar negeri. DYTMs Tuanku Canselor juga berkenan untuk menyampaikan cenderahati kepada wakil dari setiap pempamer dan melawat ke booth-booth pameran yang telah mengambil bahagian.

Secara keseluruhannya, pameran selama dua hari ini telah berjaya menarik perhatian bukan sahaja di kalangan ahli IMT-GT malahan pelajar-pelajar sekolah di seluruh negeri Perlis turut mendapat manfaat dan berpeluang untuk menyaksikan sendiri produk-produk penyelidikan terkini yang dipamerkan. Justeru ia sedikit sebanyak dapat menarik minat mereka di dalam bidang penciptaan dan inovasi.

